

DOMENIE XIV «VIE PAL AN»

Jutoris pe Liturgjie

Domenie, 9 di Lui dal 2017

Se domenie passade o stavin scoltant ancjemò lis istruzions di Gjesù ai dissepui pronts a partì pe mission (Mt cjapitul 18) vuê o cjatìn che i dissepui, finide la lôr mission, a son za tornâts li di Gjesù a contâ la lôr esperience, ma soledut a scoltâ di gnûf il lôr Mestri (Mt 11, 25-30).

Midiant il vanzeli di vuê, o sin presints ancje nô a un dai moments plui bieî de vite di Gjesù cuant che ancje a lui, dopo i faliments (11, 16-24) i si son vierts i vôi e al disè: Ti benedis, Pari, Signôr dal cîl e de tiere che tu âs...

O vin dibisugne che il Mestri nus vierzi i vôi ancje a nô. O jerin usâts a dipendi in dut dal plevan pe ultime peraule in glesie e fûr di glesie ma chei tims a son superâts e ancje il predi al è simpri plui râr e lontan.

Gjesù no si lamente che a mancjin i predis (nancje no ju veve ancjemò istituûts) ma al benedis il Pari parcè che tu âs tignudis platadis chestis robis ai sapients e ai inteligjents e tu ur es âs palesadis ai sempliçs.

Cheste peraule e dîs tant ancje pai nestrîs paîs cence predi; e no vûl dî: "Al è dut facil"; e vûl dome dî: chel che al à orelis, ch'al scolti! (Mt 13, 43).

Antifone di jentrade

Sal 47,10-11

O stin pensant, Diu, al to boncûr
dentri dal to templi.
Come il to non, ancje la tô laut, Diu,
e rive sun dute la tiere;
incolme di justizie e je la tô gjestre.

Colete

Diu, che inte umiltât di to Fi;
tu âs tornât a tirâ sù il mont ch'al jere colât,
da ai tiei fedêi une sante contentece
par ch'a puedin gjoldi pe eternitât
chei che tu âs sfrancjâts de sclavitût dal pecjât.
Pal nestri Signôr Gjesù Crist to Fi, ch'al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE

Za 9,9-10

Ve che il to re al ven li di te, sclet.

Tal passâ dal timp, a Gjesù i devente simpri plui clare la strade di fâ. Fra i tancj liberadôrs politics-religjôs che il popul al spietave, lui nol sarâ ni chest ni chel ma un messie sclet, montât suntun mus e no suntun cjeval di vuere. Anzit, l'arc di vuere al vignarâ crevât.

Ancje nô o volaressin un liberadôr trionfant tal mont di vuê, ma Gjesù nus dîs: imparait di me, ch'o soi pazient e umil di cûr. Chest nol vûl dî sedi remissîfs o gloti dut ma dome che la sô liberazion e je chê di un om pazient cuntun cûr grant, libar e no-violent e umil parcè che ur puarte la buine gnove dal ream di Diu ai vuarps, çuets, levrôs, sorts e puars (cf. 11, 5).

La profezie di Zacarie e aparten al secul IV p.d.C. cuant che al jere paron dal mont Alessandri il Grant, de Macedonie. Gjesù al resone propit al incontrari di chel re tant famôs.

Dal libri dal profete Zacarie

Cussi al dîs il Signôr: «Gjolt une vore, fie di Sion,

scriule, fie di Gjerusalem!
Ve che il to re al ven li di te:
al è just e vitoriôs,
al è sclet e al è montât suntun mus,
sul puieri di une musse.
Al fasarà sparî i cjars di Efraim
e i cjavai di Gjerusalem.
L'arc di vuere al vignarà crevât
e ur contarà la pâs ai forescj.
La sô paronance e sarà di un mâr a di chel altri,
dal Flum fint ai confins de tiere».
Peraule di Diu.

SALM RESPONSORIÂL

dal Salm 144

Chest salm, al n. 145 dal Salteri, al è veramentri adat a la liturgjie di vuê e une vore biel tal originâl che al conte i tancj motifs che o vœi laudâti, gno re e gno Diu.

Vuê noaltris o podìn laudâ il Signor par vie che Il Signôr al è pazient e di boncûr, pegri tal inrabiâsi e splendit te misericordie.

R. Benedet sêstu tu, Signôr, umil re di glorie.

Se cjantât: Il cjant dai salms responsoriâi, p. 64.

O ben:

R. Aleluia, aleluia, aleluia.

O vœi laudâti, gno re e gno Diu,
o vœi benedî il to non in eterno e par simpri.
O vœi benedîti une di daûr chê altre
e laudâ il to non. **R.**

Il Signôr al è pazient e di boncûr,
pegri tal inrabiâsi e splendit te misericordie.
Al è bon cun ducj il Signôr,
il so afîet al rive sun dutis lis sôs voris. **R.**

Che ti laudin, Signôr, dutis lis tôs creaturis,
che ti benedissin ducj i tiei fedêi.
La glorie dal to ream ch'a contin,
dal to sflandôr ch'a fevelin. **R.**

Il to ream al è un ream di ducj i secui,
la tô paronance e dure par dutis lis etis.
Lui al ten sù chei ch'a clopin,
al torne a jevâ sù chei ch'a son colâts. **R.**

SECONDE LETURE

Rm 8,9.11-13

Se cul Spirt o copais lis oparis dal cuarp, o vivarês.

Se un nol à il Spirt di Crist, nol è dai siei. Ma se il Spirt al è a stâ in vualtris... Diu ur darà la vite ancje ai vuestris cuarps. No dome une vite al di là de muart, ma za une vite gnove insedade te peraule, tai esemplis, tal Spirt di Crist. E nô o varìn un mût di vivi gnûf crei. (cf. Rm 6, 4).

Dome cussì la nestre vite e deventarà degne di jessi vivude.

De letare di san Pauli apuestul ai Romans

Fradis, vualtris no sês sot de paronance de cjar ma dal Spirt, dal moment che il Spirt di Diu al è a stâ in vualtris. Se un nol à il Spirt di Crist, nol è dai siei. Ma se Crist al è in vualtris, il cuarp al è muart par colpe dal pecjât, ma il Spirt al è vite par vie de justificazion. Alore se il Spirt di chel che al à resussitât Gjesù dai muarts al è a stâ in vualtris, chel ch'al à resussitât Gjesù Crist de muart ur darà la vite ancje ai vuestris cuarps distinâts a la muart e lu fasarà in fuarce dal Spirt ch'al è a stâ in vualtris.

Sicheduncje, fradis, no sin in debit cu la cjar, in mût di vivi seont la cjar. Di fat se o vivarês seont la cjar o murarês. Se invezit cul Spirt o copais lis oparis dal cuarp, o vivarês.

Peraule di Diu.

CJANT AL VANZELI

cf. Mt 11,25

R. Aleluia, aleluia.

Benedet sêstu tu, Pari, Signôr dal cîl e de tiere,
parcè che ai piçui tu âs palesât i misteris dal ream dai cîi.

R. Aleluia.

VANZELI

Mt 11,25-30

Jo o soi pazient e umil di cûr.

*Ti benedîs Pari parcè che propit ai sempliçs dai nestris paîs tu palesis i misteris dal to ream.
Ti benedîs parcè che nissun dai sapients e inteligjents di chest mont al pò arogâsi il dirit di cognossiti, ma dome chel che il Fi al vûl palesâjal.*

Ti benedîs Gjesù parcè che, o bogns o triscj, a ducj tu nus dîs: Vignît di me; tu nus gjavis la cjame pesande di tantis prescrizions religjosis inutilis e tu nus lassis un unic jôf dolç e lizêr: chel di un amôr a Diu e al prossim nudrît dal to esempli.

Dal vanzeli seont Matieu

In chê volte Gjesù al disè: «Ti benedîs, Pari, Signôr dal cîl e de tiere, che tu âs tignudis platadis chestis robis ai sapients e ai inteligjents e tu ur es âs palesadis ai sempliçs. Sì, Pari, parcè che cussi ti à plasût a ti. Dut mi è stât dât di gno Pari: nissun nol cognòs il Fi, fûr dal Pari, e nissun nol cognòs il Pari, fûr dal Fi e di chel che il Fi al vûl palesâjal.

Vignît di me, ducj vualtris ch'o sês stracs e masse cjamâts, e jo us fasarai polsâ. Cjapait sù il gno jôf e imparait di me, ch'o soi pazient e umil di cûr, e o cjararês confuart pes vuestris animis. Parcè che il gno jôf al è dolç e la mê cjame lizere».

Peraule dal Signôr.

Su lis ufiertis

Cheste ufierte consacrade al to non
che nus smondei, Signôr,
e nus puarti di zornade in zornade
viers de vite dal cîl.

Par Crist nestri Signôr.

Antifone a la comunion

Sal 33,9

Cerçait e o viodarês cetant bon ch'al è il Signôr:
furtunât l'om che li di lui si pare.

O ben:

Mt 11,28

Vignît di me, ducj vualtris ch'o sês stracs e masse cjamâts,
e jo us fasarai polsâ, al dîs il Signôr.

Daspò de comunion

Colmâts di tancj regâi, ti prein, Signôr,

di cjapâ ancje il regâl de salvece
e di no cessâ mai inte tô laude.
Par Crist nestri Signôr.

* * *

Riflession di pre Antoni Beline: **I piçui prin dai sapients e dai furbos**

Une volte Gjesù al à dit che i fis di chest mont a son plui furbos che no i fis de lûs e ju à laudâts par cheste furbetât. Parcè che a jerin tant vuaîts ch'a rivavin no dome a doprâ lis robis di chest mont, ma a comprâsi ancje la vite eterne. Tant a dî furbos al indopli. Il Signôr al laude cheste furbetât juste. E di fat nus insegna a fâsi amîs cui bêçs vuadagnâts malamentri...

Vanseli par un popul, an A, p. 161

* * *

Sante messe e Eucaristie, rîts, preieris, cjants: Hosanna pp. 34 - 119.

* * *

Cussì il Diu dai puars al à sielzût i puars pastôrs par palesâ il misteri de sô vignude framieç dai oms. E lôr, che no vevin studiât, che no cognossevin lis Scrituris, che no vevin pussibilitâts umanis o politichis a vevin però une ricjece uniche: la libertât dal cûr.

And'è robis cussì simplicis e scletis che un studiât no lis capîs e nancje un furbo. E par rivâ a Crist la strade plui drete e je chê de simplicitât dal cûr e de disponibilitât.

Pre Antoni Beline

* * *

Lunis 10: S. Piu I, pape. Al jere nassût a Aquilee e si sentà su la sente di Rome fra il 140 e il 154. La sô venerazion a Aquilee, e je testimonee dai timps plui antîcs.

Miercus 12: Ss. Ermacure, vescul e Furtunât, diacun, protomartars de glesie mari di Aquilee e protetôrs des arcidiocesis di Gurize e di Udin.

Joibe 13: Inte Dedicazion de Basiliche di S. Marie di Aquilee.

Domenie 16: As 6.00 sore sere te basiliche di Aquilee, messe di Avôt dal Friûl ai Ss. Ermacure e Furtunât, seont la tradizion di ogni an.

* * *

- * *I cjants, salms e cjantadis a vegnin ripuartâts cu la numerazion dal libri: Hosanna, Cjants e preieris dal popul furlan, Ed. Glesie Furlane, 2012.*
- * *Il cjant dai salms resposoriâi, Ed. Glesie Furlane, 2012.*
- * *50 corâi de cristianitât todescje voltâts par furlan, ed. Glesie Furlane, 2016.*
- * *Il libri des riflessions sul Vanzeli al è: pre Antoni Beline, Vanzeli par un popul, an A, Ed. Arti Grafiche Friulane.*
- * *Par domandâ chescj libris scrivêt a info@glesiefurlane.org*